

廣黃帝本行記
韓軒轅
轅黃帝
仙黃帝
傳傳記



韓

仙

傳

韓若雲 自撰

中華書局

韓仙傳

唐 瑤華帝君韓若雲自撰

予大周之韓原人。始氏以國秦楚進滅後。有叔通子者奔武城。遂姓韓氏。因契夙器。遊於海東。足成仙聖。枝蔓蘿帶。牽連不已。漢之東西晉之前後。史譜已載。高宗永徽四年癸丑。先祖曰仲卿者。刺史江南。人受德濟。遂家於鄧州之南陽松水焉。玄宗天寶壬午九月。先父生。有異質。既長。以存著名。諱曰惑。尋改曰會。應代宗廣德元年癸卯。鄉舉。大曆二年丁未。秋。仲卿祖薨。先父盡大禮。襯掩於匡廬之五老峯下。卜者曰。得此者位極人臣。二十年後有仙者出。先父與姑子蕭存。築舍於西林寺守墓焉。蕭存歷官至郎中。惡襄延齡不仕。歸養於茲。明年戊申。上元繼母祖賀氏生叔愈。五年庚戌。叔三歲而賀母死。先父拊之。先父歷官起居舍人。十二年丁巳五月。先父坐元載貶嶺表。既歸南陽。叔日記數百言。通六經百學。建中四年癸亥。朱泚亂。先父攜叔奔遷韶嶺。先父爲人善清言。有文章。高世江南宣城有別業。先父亦就居。八月有詔徵先父。以衰頹不可就。因二辭。遂爲訕謗。不用。及韶嶺兵寇復歸。苦勵叔以讀。興元元年甲子登薦。時叔年十八也。貞元元年乙丑。謂叔曰。吾蚤失怙恃。吾母清河崔氏亦卒。汝母生汝。卽捐。而幸成大人矣。我年過半。所不盡恨者。汝嫂呂氏之不嗣也。天欲何爲。言已。淚下。叔曰。弟所得生。兄之育也。弟之成人。兄之教也。弟立身過望。兄得勝天矣。德必厚福。況垂世乎。兄其毋憂。先父稍解。七月爲叔娶扶風之竇女焉。先父騰

於嶽神之西夢曰虎榜中鄉闈庭分桂一枝最憐雙遂後賓鴈各于飛明年丙寅三月七日甲寅之辰而吾孀寶氏忽見丹鶴飛入中庭先父亦見隨入方舍絕無影迹六月乙未七日庚申之酉而予生時也天垂吾異地應百祥鄉里有見老鶴翔空者先父以鶴爲名謂叔曰昔卜吾父五老葬地者開府子儀郭公也謂我有仙者出丁未迄今二十載合其讖矣叔曰異教也神仙杳茫兄何獨取乎吾聞周孔正世餘不復知矣未聞以黃老之無君父者可以定天下也弟每不深恨此輩他日有望必入其人火其書明道以導盡去其教而後已先父嘿然初蒼梧之野寶龍峯西北有洞曰皇老東華李公西城王公相傳道靈合極神丹予以太素稟質太易賦性太極會形冲冲冥冥莫可先悟遂托形於胎仙氏時東漢之明帝永平庚申中秋也西晉惠帝元康九年己未予生二百有四噓吸踵固輕翻虛靜故獲遠考龍沙起運有仙者迭出于皇老洞遇李王二翁在焉予翱翔空際倏忽漠落穿雲漠舞松風上下於紫翠之間是夕七夕也月影垂鈎織星半渡電光羅動於銀津間人籟家家寒光拂拂露含山草猿抱枯藤二翁對酌童子捧符一童進朱橘囁酒談及妙旨略曰人稟先天溺於後天雖一草一木莫不皆然但能回神於外明定神於內官馳神於空窟知神之舍返神之遊則天地之精華可收吾神之妙用亦能沉潛以和對谷以應明而靈靈而神神而至神而又至於身外飛神則得仙矣西城曰所以謂其能明能靈者何翁曰人物最關性命者神也生虛則爲氣生濕則爲精生夢則爲魂生形則爲魄生想則爲意至於肌膚四大莫不曰神而感也於此上安身天地之自然聖神之造化自得矣談至東方欲白天景漸收啓明高可丈許予聞之

心竅洞明。長嘆數聲。翁不覺失聲曰。是兒悟矣。悟矣。予得領微旨。卽以神神之道。治於洞口。仙翁去矣。香風間。瀑布乍響。洞烟裊裊。梅魂如恍。予饑茹渴吸。自掃清賞。時有蒼猿公。玄丈人。寓焉。遂爲誓好。然山峯峯岌。雲深樹合。雖老樵熟獵。無能見者。唐貞元之元乙丑。又四百八十六年矣。上帝若曰。延康立極。赤明開圖。仙當用薦。厥補神都。用敕汝無量大通神霄仙卿呂巖。遍訪塵寰。超凌上品。以佐太上無爲元元至化。惟卿勿怠。如勅格行。純陽翁遂飛歷八都。無地不涉。忽一日憩於蒼梧之陽。予已洞識矣。予更名水壑老人。與玄元丈人共謁焉。翁固知之。僞問曰。子何人耶。予口致詞曰。山林老隱。端悟性宗。幸值三生。何蓬仙聖。雖飲松流。啖雲實。獨甘恬苦。願剖冰壺。開玉藏。發我盲聵。是爲野人之至望。翁笑曰。子野則野矣。人或未然。姑試子。遂示詩曰。兩口談玄。并是虛。山高下品亦非居。洞前縱有千年計。濱海蓬萊總不如。其意諭以蒼梧雖美。塊中耳。不若蓬萊之能久居。而其中微示以呂巖洞賓字意。猿初不悟也。遂輕之。予跪進曰。公非純陽呂翁耶。翁曰。子言是也。可教。遂以鐵丸三枚。命曰。二子服之。可立死而化於人道。予將度汝爲仙。猿畏拒之。予欣授而次第吞之。但覺神凌至虛。翁乘之而起。猿哀號不已。予再瀆之。翁曰。子仙緣猶隔一世耳。托質於人。吾當再度汝矣。飄飄而上。越東海入方丈之顛。見東華翁曰。美則美矣。恨毛圈耳。可更其身。當躋上域。遂命翁送之。翁領予神逕抵唐國之松水。投予於呂母之懷。囑予曰。汝勿言。吾來視汝。遂降生焉。蓋吾母乃翁之從孫也。未幾先父與叔棲扶風寶館。次年丁卯苦疫。先父卒。於八月十二死。經時復起。索書囑叔曰。賀母生伊亦此時。我於此上獨堅持。今朝長嘆歸乎數。維汝憐孤立我兒。叔曰。

分內事也。兄何憂耶。視弟爲不義耶。遂嚙指爲誓。先父揮淚而逝。時人有議叔傷遺體者。叔曰。不然。兄何暇安耶。聞者皆嘆服。叔慟毀將絕。親隣百計慰問。遂上山陽野雲葬焉。蓋以匡廬之遠故也。叔待先母以母道。晨夕問寢。先母頗識字句。亦嘗勸學。貞元五年。己巳。先母亦歿。時子年四歲。淑儀慈色。尙可配十之二。子抱負宿興。皆委於叔也。八年。子七歲矣。然猶記翁不言之囑。終不呼一字。叔不悅曰。是兒痴物也。寧馨耶。葛靈耶。何日得精爽耶。強笑而負之。遂爽爲小字。十年甲戌。叔舉進士歸。予喜失聲曰。叔歸矣。予叔母趨視果然。與叔大以爲樂。是夜恍惚曹隣。次辰遂瘡不能出一聲。但哭眺而已。叔求之百計。莫可瘳。午陰正辟。忽有道人黃裳紫冠來謁。謂能發我聲。蓋呂翁也。叔喜。微予與視。翁笑曰。而忘予勿言之訓耶。予不覺律管發輝。答曰。有罪有罪。遂爲予名曰可名湘。可字清夫。他日當爲我方外弟子。叔大誕之。叱之出。予遂能言。次年乙亥。叔譏陽城作爭臣論。拜御史大夫。十四年戊寅。大夫孟東野張籍叔友也。媒於東閣。學士林圭國甫之女於予而娶之。女善談詠。小字蘆芳。予年少不喜女容。近之則自赧。終不一與。予十三歲矣。叔日以經史爲訓。予頗敏。擇願上先生師焉。先生死。予舍於家。叔親教之。四月十四壬申。呂翁變名宮。無上謁叔。談及羣書百家。無不熟獵。叔延三宿。大以爲奇。遂命館側。予師之。旣居。晝則訓予修身治國之道。夜則授予內鍊童真之道。予深信之。翁曰。修身可人爵。而老死迷真。修真可登仙。而長生不朽。二者不可並學。子欲何擇。予曰。貴不可久。仙願學焉。翁喜而教之。然蒼梧之事。予皆忘矣。未幾爲叔宴集。時塔下有匠者用銅錢汁補鐵甌者。時翰林虞公命予對曰。銅鑊補鐵甌。予對曰。鉛汞合金丹。座上皆詫。叔曰。

汝何以知之。予曰：師教之也。言未已，侍兒進曰：宮先生夜夜教公子以神仙之事，叔愈怒，撻予。索翁責之曰：吾兒儒外之習，吾不之譴，始吾以汝爲高士也。禮之，汝敢以惑世誣民之事以搖其心耶？速去，勿致辱耳。翁笑而去。囑予曰：子能憶昔蒼梧之苦，當來終南之碧雲峯求我。去此三百里，子不惜，則一大失矣。予日夜慕之，甚於父母。中宵予亦遁，叔嚔泣大索。三月不能得，予道經鄜南峰，老嫗一宿，嫗惑予以美女，予力卻之。彼策材而遁，予終不伏。天曉，則茅屋嫗女皆不見。予始去。蓋翁一試也。又過太白嶺下，是時聞有虛言，叔覓官迫者，不敢盡行。是夜月明，當空忽見前林密處燈火交遞，予趨進，則白骨叢堆，有一厲鬼執子曰：子非韓爽乎？予跪曰：是也。鬼曰：子父母得汝而亡，子叔俯汝而生，恨不汝撐天破浪以光世代。子欲逃何地耶？汝不肯子也。予得而食之。予曰：我所以逃者，宮僊人之教也。鬼曰：宮僊人妖士也。汝聽其惑，汝父令我先食之矣。予曰：宮仙人教我以善，既死，我已捨心，事彼我亦當死以求見耳。請食之。鬼曰：汝歸去，吾或可恕。予曰：有死不歸，言已。鬼曰：吾去喚同輩來，當分食汝。言已不見。予奔，蓋翁二試也。入長樂坡，道見一布裘，予開視之，烹羊蹄一具，酒一壺。時予甚饑，思必有主，坐守之。少焉一婢遠哭而來，予還之，拜謝而去。即不見。蓋翁三試也。轉沙溝界，予餒甚，坐石下，有二夫逐豕，見予曰：子爲我守此豕片時，我有遺豕往尋之。復遣予以熟食，予飼而飽。二夫去，中餉不至，有一虎自叢莽中出，欲搏豕。予曰：受人之托而爲汝搏，是不忠也。願自代。因納豕於荊棘中，而身當之。虎回首大吼，遂入窟穴。莫知所之。少焉二夫長笑而來，牽豕而去。蓋翁四試也。予前不十里，路岐甚岔，有農夫罔以逆路，不覺迤至扶風柳林，有丐者深酌酒，極

醉。當於要路。冒罵千百。以至萬計。予不敢答。索子錢。予罄囊與之。又索米。予止二升一合。並與之。方稍解而去。蓋翁五試也。既達終南界。問碧雲峰於樵人。時一羸樵甚醜。答予曰。子欲訪誰耶。予曰。宮先生耳。曰。宮先生吾故識也。始以美名重。世人皆畏之。既而久居。犬彘不爲也。因淫盜無常。人不與食。今將死矣。子訪何益。彼不死。吾輩欲執於官以誅耳。子勿貽池魚之禍。速去之。予曰。予此來欲見後可。雖有禍願爲之死。彼曰。子非智士也。去。去。彼可於紅樹下。藁中求之。言已而去。數步復回顧予曰。惜哉。此子送命九泉也。予雖信之心。終不退。進山壑極險。攀緣而上。蓋翁六試也。已而挽烟蘿。步劍石。迴紆苦草。涉歷蒲蘆。雖狼窮虎止之地。無不經涉。果見盤陰之下。有紅樹焉。蓋老楓也。下得一破茅舍。遠睨烟火。微出。予手分刺棘而入。則破壁敗燼。藤榻石枕。先生弱瘦。不可目視。雙眸不開。釜有殘豆羹。案有破書半卷。視之命書也。先生狂呼大哭。不省人。故予再三喚之。先生曰。汝鬼耶。取我耶。予拜泣曰。弟子湘也。自先生教我而來。如忘父母。今日帶月披霜。未避險夷。求見先生。以復昔約。先生何外我耶。先生曰。我記之矣。我先以文學有罪於世而逃。既而衣食不給。復肆張於汝叔。而復以妄言誘汝。以至今日。老天使我受此苦者。正此報也。子可回。勿悞青芳光景也。我頭下有金二餅。可供歸費。子歸。可薦我於九泉下。況此地虎狼交雜。蛇虺出入。雖一薪一汲。必逢百度。子不可久。予曰。弟子此遇。心方得已。雖虎蛇淪啖。甘苦不辭。先生昔爲我師。今日既見先生。困憊而離。禽獸不爲也。願以死同。先生泣曰。子今日好心矣。我死何以報之。予曰。先生但安心以自保耳。三日後先生謂予曰。我思泉水。子往求之。予遂去。山壑之下。羣草交翠。密封湍流。予方就汲。

忽一蛇長計丈許。盤旋張口如箕。欲相啖狀。予跪視曰。人世萬物。必有靈識。我師得罪天地。以致疾疫。思飲甘泉。命之於我。我以委身師事。敢不忠罄。子既我傷。將賜我水以周師急。我必返身任汝啖也。言已。蛇蜿蜒數折。草蔓皆伏。威聲如風灌耳而去。蓋翁七試也。得水而歸。先生飲之。遽起而大笑曰。子非下品人也。吾非宮無上也。宮字無上呂也。吾初唐之洞賓也。七度試子。皆合天格。子可教矣。遂引予出舍。不二里。山景異常。指一峯巒曰。此碧雲峯也。一喝而白壁開。曳予口卽如王宮帝闕。金紫交映。彤碧混合。如白晝焉。少焉二童曰。翁待師久矣。攜入大殿。下一翁居上。環日方面。高冠坐首。先生曰。此東華李公也。吾昔年事汝。知否。予都不悟。先生命再拜。東華翁曰。可取飲飲之。少頃童進醴。予飲之。肌骨皆寒。先二世事無不記憶。方再拜曰。一迷不覺十四載矣。翁笑而納之。時貞元十五年八月中秋也。予年十有四。翁復引予謁雲房鍾離翁。西城王翁。火龍鄭翁。而授予以道。越一百二十有四日而成道。予謁上帝。帝曰。子來授汝開元演法大闢教化普濟仙卿。予謝而退。遊蓬島。但見琳宮貝闕。天影彩霞。自然吟咏。仙侶徘徊。誠所謂試向崑崙巔上望。十二樓臺無處尋也。三十日復召謂曰。卿叔韓愈。乃吾仙甫冲和後身也。微過謫世。子何不往度乎。予遂領旨而下。則山川變態。人物流移。恍然腥塵中耳。永貞元年乙酉。因叔先十四年言早譴罪於德宗。黜爲山陽令。次年取歸。經湖南。遊衡山宿二日。雲房純陽翁更爲二道士勸叔曰。人世轉丸。命數飛燕。光陰不可得。美官不可久。公胡不相將猿鶴。久世以長生耶。叔叱之曰。何物妖士。敢與蠱語。二翁遁之。元和五年進官河南方西令。轉國子博士。十年乙未。叔爲考功郎中知制誥。十二年丁酉。憲宗正旦。

朝賀留宰相裴度妻父林圭及叔宴之。問曰：今歲豐儉若何？叔失對曰：儉。上曰：何以知之？叔曰：去冬無雪，故知儉。上曰：可禱乎？叔曰：人主至誠，災感失度，尙徒之況雪乎？時諷諫耳，不意憲宗出旨，遂的限於叔三日精禱致雪。叔大惶措，予喜曰：叔可度矣。時高第百餘日，肆雌黃。老氏之教言必深惡，予遂出榜檐頭曰：賈風雲雨雪，市夫訝予妄，報於叔。叔收予，予已異形，叔不能識。詰之曰：上以年歉，預禱雪以示豐，汝何人耶？敢言慢乎？敢曰：賈乎？予鼓掌胡盧而笑曰：人以爲難，吾身中先天坎離，太極混合，乾坤尙可顛倒，況後天之雨雪乎？叔曰：汝可祈則爲我試。予曰：諾。索酒大醉，遂登壇。半日，靄雲漫野，寒氣侵骨，天光一合，六出立降。深可尺許。裴張諸公大以爲異。叔謬曰：人君至誠，人臣至專，所爲耳。豈一道士之力耶？衆皆不服其論。予大笑而退。是日拜刑部侍郎。宴賀予謁之，始也善待，既而接待中微語勸以急流之說。叔果大怒而斥之。予曰：神仙有變化之妙，公不可爲泛。叔曰：汝能盡一杯之酒，能真諸公醉耶？予曰：甚易耳。公當隨我。叔曰：汝爲之。予遂取所佩葫蘆，徑可一寸，高可寸許，盛酒半杯，卽滿。因而遍席勸之。凡三十人，各記三十巡，中宵不竭。衆皆駭。叔曰：此民間漏酒法也。叔復曰：汝可召二妓飲舞乎？予曰：亦易。予面空召之。仙妓立降。衆又異。叔曰：幻術也。叔曰：可召鶴乎？予卽召鶴下舞。尋化爲羊，口出歌賦，其中無過勸叔之修省也。叔皆以爲幻。予大言曰：公欲爲天子耶？貴極人臣，尙不知遺禍而早退，一旦誅貶，風塵千里，凍餒而死。妻子榮祿可復得耶？叔大怒叱予出。次日復謁，則已重門鎖鑰，不可入矣。予飛空而入，至中甕而下。衆皆驚。叔曰：何來？予曰：上壽耳。叔曰：何貺？予曰：金蓮耳。遂索火一炬，予投以丹，少頃蓮花大發，高可三尺，碧盤寶華。

靡不一具。中一葉自然成聯云：雲橫秦嶺家何在，雪擁藍關馬不前。叔視之曰：此何語也？予曰：公遭誅，豈可當驗之？叔大忌之，執予供。予立書曰：供狀列仙，年甲不具，生於松水，長入蓬萊，三台護生，五炁全體，身朝元始，出入雲衢，恭東華爲主，歸鍾呂爲師，丹藥度羣黎，跨鶴遊海島，因愆叔遭險，命入刑囚，暫假下瑤池，拔救來鄉，貫一報鞠育，二謁祖宗，今承供審，大羅天甫開元演法，大闡教化，普濟仙卿，松水昌黎郡仲卿嫡孫，清夫謹狀。叔再三視之，不覺淚下。予遂示以原形。叔大哭曰：子何風顛如是耶？吾慕汝念汝，如刀碎中心，子何忍心耶？予曰：姪上朝天帝，今爲仙宰，思叔之德，慮叔之難，特相援耳。叔曰：汝勿妄言，旣而見寶母，則蒼顏矣。而予妻尙在，予不之顧。諸公爲之大慶。一日，叔誕時，上元也。予捧蟠桃一枚爲壽，衆爲奇遇。叔曰：此冬桃耳，善藏者能留之，何異？予知不可度，呈以詩曰：青山雲水窟，此地是我家。寶鼎藏金虎，元田養白鴉。一瓢藏世界，三尺斬妖邪。解造逡巡酒，能開頃刻花。有人如效此，同往翫仙葩。叔曰：子去家二十年，尙荒涼貧窶如是，而更復誘我耶？百計諭之，終不就。予留詩於壁曰：我欲隨公去，千言固不從。藍關雪深處，來歲更相逢。叔覽之，揮泣而罷。十三年戊戌，叔進吏部侍郎。時鳳翔寺塔有佛指骨放光，上遣中使迎之。叔而諍之，上不聽。罷朝，次年骨至，上留禁中。二月，送諸寺，人皆大惑。叔表諫數百言，陳梁武故事，上怒收欲誅之。宰相裴度崔羣林圭爲言，乃貶潮之刺史。叔別家往官，經藍關秦嶺，正值大雪，馬憊於道。從者二人皆遁去，叔獨無倚待死而已。予冒雪見之，叔號呼百狀，悲喜交集。始曰：子先言誠有驗矣。予迷耳，遂成完詩曰：一封朝奏九重天，夕貶潮陽路八千。本爲聖朝除弊政，豈知衰朽喪殘年。雲橫秦嶺家何

在。雪擁藍關馬不前。知汝遠來應有意。好收吾骨瘴江邊。子勸曰。叔今上不得於君王。中致離於祖。禍下不及於妻子。近有類於千金軀。正此可隨姪以效長生耳。叔曰。君命謫潮。予當匍匐事命。力不足。死亦理順。而欲我隨遁。是逐君怒。逐君怒是不忠。縱仙可學。安可成乎。予有死而已。汝勿言。況君限有罪於家。汝孀母置何地耶。予囊有糧。可旬日待。雪霽乞諸郵驛耳。予感其忠。請命於帝。帝曰。卿當隨事。可緩化之。予得旨。遂謂叔曰。可攜姪往乎。叔曰。此過望也。越七日過嶺。予爲之買塞僕而行。逾月入潮。訟政之間。予有神識。叔得振威二廣。溪有鱷魚食人及畜。叔作文以祭。予勸神殺之。懸首以示民。大奇。叔方知敬於予也。予日以勇退爲勸。叔曰。吾但得歸見宗祖。卽當隨侍。任所之耳。予曰。不然。姪之來者。報叔舊德也。方今吾叔窮極。叔尙不知從。他日歸有妻子之私。何言及此。叔曰。予負今日語。天當殛誅。雖今日之潮陽。亦不可得。予信之不更瑣。常教之導引禦瘴。復教之守神。叔從之。穆宗立。長慶元年辛丑。徙叔於袁州。予隨去。時袁有盜羣百。哨於山林。害占二縣。民奔之。予議叔收。叔失策。予曰。易也。予雪夜獨騎伏劍入巢際。賊遙見大懼。予命神吏縛之首者三人。餘皆縱其散遁。救民萬計。叔得功。觀察王公表之。二年召歸。叔過匡廬之五老峯。謁祖墓。經蕭存舊址。存初與先父共廬於茲。字伯誠。隱此而死。叔少爲所俯。存有子蚤死。移女蕭小貞出家爲尼於西林菴。叔訪之。號泗終日。勸其復俗。終不就。因遺金貳拾兩於家。立其孫凌漢焉。叔見小貞之操。題其壁曰。中郎有女能傳業。伯道無兒可保家。今日匡山過舊隱。空將衰淚洒烟霞。子進曰。此女可度之。叔曰。能乎。子遂贈藥一粒曰。汝孝敬可重。吾叔吾父。汝父所愛。吾固報汝以此也。女再拜而退。是夕

服之神思精爽。見寺神謂曰：韓相公姪非人也。見位天仙也。汝可師之。次辰女蘿地而告曰：姜父之死。姜獨捐生欲報至恩。故假於釋。今者吾師大仙也。願度頑形。願補陋濁。予愍之。遂以丹餌之。是夕化。叔泣而瘞之。子因送於龜臺。金母易名瓊瓊。侍衛以長生焉。朝見拜國子祭酒。叔已皓首矣。始見家族。子妻已卒於元和十五庚子矣。叔二子源滾。滾死。明年勸之。叔曰：神僊可唾手於功名乎。子曰：何難。叔曰：子欲我從遊。但能取進士。子傾服之。子曰：諾。叔遂薦子於太學。明年甲辰。子以天馬長門秦階三賦登栢耆榜。列名十二。子不仕。詭以風症上疏辭曰：臣以猥木。得薦天匠。危棟既倖。疲癯忽作。思輔神綬。永膺台化。天命止在。空苦微軀。臣松水有尺壑。可保勞頓。乞恩歸祿。以藏筋骨。無任感躍。上宣旨曰：卿以雋英。作朕高柱。艾年微困。何致重辭。命諸方藥。以瘳肺腑。卿其尙忠。勉進針石。是爲朕快。醫工來治。子示以死脉。果復命。上遂允歸。叔始誠信。五月拜吏部侍郎。得復舊爵。時蒼梧之玄元丈人已生於霸陵西村朱氏。年三十。呂翁遊五臺來。爲貧道者。乞食於家。朱氏名拾得。敬之。飲餘翁命之飲。遂啜之。翁復以劍囊寄之。出舍遺金二餅。彼遂封之。翁至而還。翁領之過澧水。悞墜劍於深波。命取之。彼卽捨生以赴。未及中流而劍自浮。隨新豐翁醉甚。逐之。跪而不去。旣而引劍欲殺之。亦不去。并無逆色。翁方解。翁過涇水。道見一乞兒索食。翁撻之。卽死。尋又一丐者來見之。卽曳翁以償。翁不辭。謂拾得曰：子可歸。吾就死矣。彼嚔哭曰：撻之者我也。汝何以誣我師耶。遂拔劍自刎。翁大喝一聲。二乞兒俱不見。謂曰：子可教。遂相持而來京師之長安門。見子曰：子何久於風塵耶。子曰：盡在三日。翁曰：是兒汝友也。當於藍關可並度之。子諾。翁去。留拾得於藍關之。

九山溪洞曰子待七日子師至矣子歸是夜下元寒魄穿櫺燈清籟靜紙帳梅花槐風竹戛清入兩耳時有孤鶴倚苔斷琴在壁與叔寢於書屋再諭之曰上帝以叔仙根道骨昔者命姪往度叔堅不從故有大患今叔大事已矣潮陽叔之親舊又完矣何不去之叔曰仙人不常見吾老死於鄉黨足矣吾恐朽骨不可長修衰氣不可壽世弃於山野死無名也姪有至諒幸爲我思子曰姪隨叔有年叔猶不知耶姪之大道可以窮桑田朽山嶽竭海源雖日月更變不致敗此身也叔如不學恐貽譴於天大必加誅又豈憲宗之法耶叔曰易則易矣何物色可隱去耶子遂以竹杖化叔之形了無一缺死臥於席叔遂隨遁子餌以飛舉之藥風騰於藍關之巔安之仙景相與拾得爲友而復命於帝帝曰卿可度之子歸詭號雙目爲叔之師子問曰汝思家耶叔曰已脫業舍委身大道復何思耶子又曰思汝姪耶叔曰聽命在師思彼何益子遂授以至道百日而神識洞達始有冲和之悟時長慶四年甲辰冬十一月也叔年五十有七子年三十有九其家見其死源弟尙幼門人李漢隴西人也葬叔屍假於鄉土愍其忠祿其子源追贈禮部尙書昌黎伯諡曰文子方蛻其舍於終南飛其神於衡嶽之眇上詔之始入太清而拾得道亦就隨去帝曰子功成矣向何迷耶不贅叔於上仙列遣子送於崑崙爲使焉叔方大悔子復奏舉祖考皆允取子之父母前七代子後一代皆附以太陰鍊形之妙皆入崑崙子相繼送之而去拾得命爲神霄仙伯焉